

欽定全唐文

卷三百二十九

卷三百三十





欽定全唐文卷三百二十九目錄

田義暉

對飴鹽造禰判

先聖廟堂碑

并序


鄭子春

北嶽廟碑

對投牋獲弟判

李龜年

對同爨不總義居芝草判





李彭年

論刑法不便表

第二表

申屠液

號國公楊花臺銘

戴璇

大唐聖祖元元皇帝靈應碑

劉同昇

大唐聖祖元元皇帝靈應碑頌

對大夫祭判

對不供夷盤判



欽定全唐文卷三百二十九

田義旻

義旻開元四年官陝州司戶參軍

對飴鹽造禰判

景以飴鹽造禰或責以苦鹽有關

虔稽祀典類造之禮攸陳緬睇齋筵俎奠之儀當潔景麗  
名宗伯展事鹽人白黑孔修錯形飴而在列元纁判備考  
齟苦而斯乖雖德之惟馨亦或罔吐而物有奠具謂何獲  
釐大事闕供小懲非逭



先聖廟堂碑 并序

大矣哉聖人之道洋洋乎發育萬物峻極于天優優大哉  
粵若元不代乎蒼故時不階其用業方驚乎霸則政莫繇  
於理人之難說也道之難明也英華久彫附枝將墜會龔  
而鼓不陳則行殷夫子負道遑遑無所鉤用者曷足病已  
夫子孔氏其先黑帝子本殷人遷於魯弋尼邱山取邱諱  
字焉以誕彌也握文履度連珠含則衡相月角河口斗唇  
首法紫宮貌齋黃帝年十有五而志於學貧無束脩謁伯  
陽訪道德之原考廟朝之則金人未毀覽緘口之銘宥坐

斯存識誨盈之器易曰君子學以聚之問以辨之斯之謂  
也三十而立其道彌尊蓋有不壙山不直地摳衣而至者  
三千餘人矣求也退而是進由也兼人而抑伯魚問學喻  
觀葦於污池端木求知恐妨生而送死易曰君子以教思  
无窮斯之謂也若乃觀易兩卦喟然不怡論詩六章惕焉  
知懼隨黃口而羅者得勉以慎從亾著簪而哭者哀旌其  
念舊欲給則豫偃也之行得之獨居思仁緇之行也由此  
易曰君子以朋友講習斯之謂也四十而不惑必聞其政  
故其參委吏會計平掌乘田牧畜息中都制法則諸侯畢



師攝相登庸則敵國咸懼七日而誅兩觀一言而毀三都  
遂返龜陰之田克殄倡優之樂易曰君子以明罰勅法斯  
之謂也若乃麤裘鞞帶化未洽而謗流章甫衮衣政既行  
而頌作弱陪臣而強公室登泰山而小天下雖復齊人來  
遺仍察政以少留及夫魯不致膳遂拂衣而高逝易曰君  
子以思患而豫防之斯之謂也五十而知天命遂能原物  
之情嗚呼道之得行也命也曷吾道之不行道之將廢也  
命也固斯文之未喪乃自衛返魯刪詩定書制禮作樂述  
易修史故其溫柔敦厚以極操指之情也疏通知遠以一闕

字

馳驟之迹也恭儉莊敬備周旋揖讓之容也廣博易良

明綴兆疾舒之節也屬辭比事褒貶天人之功也潔靜精

微範圍乾坤之化也用能極乎天而蟠乎地窮乎性命而

通乎鬼神易曰君子以反身修德斯之謂也六十而耳順

遂知來物詳夫天殃所及先陳魯廟之災土怪攸興宐識

季卿之問辯防風之巨節吳使嗟稱稽肅慎之遺箸陳人

悅服顏回不貳吾亦食而無疑商瞿必昌爾詎勞乎更娶

齊禽大舞聞備水之謠趙犢其誅起迴輿之操月離于畢

既應之猶響萍觸於舟其食之如蜜石函金簡豈謂赤雀



之符縹筆單衣方陳紫麟之典易曰君子為能通天下之志斯之謂也至於懷胥附之友感萎蘭以滂施闕一御侮之交聞震雷而惻怛重五教而垂範含萬物而化光人到於今訓其成式故能酌焉而不竭注焉而不滿苟非聰明睿哲達天德者其孰能與於此易曰君子以多識前言往行以畜其德斯之謂也七十而從心所欲不踰矩故虛以受物貴而下人惜其腐餘享以仁人之饋嘉其美味喜當甌中之食請長生之訣引咎於闕一童聞官志之名訪學於鄰子易曰君子以虛受人斯之謂也若乃言而不用莫

顧廩邱之封命則未通詎免匡人之厄諱窮久矣而不免者命也求通久矣而不得者時也易曰君子以理歷明時又曰不可榮以祿斯之謂也雖復春居籠兮夏居密秋不風兮冬不煬閱逝川兮若斯歌頽山兮何及越哀公六年夏四月己丑尼父卒凡享年七十有三嗚呼哀哉門人追在三之義盡喪之禮封為馬鬣葬於泗濱公西掌其凶事子貢廬於墓側若乃平鄉聖跡金石乃聞北里神塋草萊自闢噫夫夫子歿而微言絕七十子終而大義乖周日陵遲漢未暇給是使籩豆簠簋將涸源而不流玉戚朱干若



顛木之微枿迨乎恭王壞宅得其藏書於是乎夫子之道  
粲然永錫罔墜者矣於戲裴迪有位示人昭範典墳之迹  
厥濟生人由後之君子或配其宗名或崇以寵秩故孟堅  
頌漢述孔相之休邱明志魯傳素王之業又孰知夫是非  
哉劉氏以哀成恤允曹王以宗聖開家自時厥後享祀罔  
絕陝州孔子廟堂者後魏恆農太守劉斌之所建也劉君  
在郡有政理故其柏樹數株尚青青焉我皇唐御歷一百  
餘年神武開元茲惟四載創則而聿修王度厲精而恢復  
帝業修文闕職咸秩廢典敷德以柔遠宣慈以和親故其

神功滂洋蒙茸陸梁魚頡而鳥鳩靈化翕翹旁魄四塞刑  
清而訟息矣銀青光祿大夫使持節陝州諸軍陝州刺史  
上柱國金城郡開國公姜師度惟兌之精乃台之耀門傳  
義窟家有孝聲文章包六氣之和仁言總五行之秀才優  
武庫當朝服元凱之名時號智囊百代識文強之價一臺  
歸妙始含香而握蘭獨坐生風更避車而住楫法河歷拜  
充物國泉咨岳累遷滿羸人望由左繇而轉扇惑蜀吏之  
追攀指分陝以褰帷見虞童之迎拜昔河內取給司徒受  
委於東京關中是資相國轉饋於西漢非夫寄深邦本功



濟人天疇能比庸允光僉屬且夫陝者陰晉之鄙寧秦之  
 郊泛舟而來控引淮海漕粟攸務糗糧軍國又聞闕一者  
 近鹽之邑鯁人廢常賓祭之用仍歲靡給自公戾止允釐  
 庶務用能美利紛積羣網備舉上資京師旁達鄰國矧封  
 略之內而有不富教者乎爰初下車顧謂儒林郎守博士  
 寧修本曰夫化人成俗者其必由學乎若函丈之義不崇  
 則子衿之詠攸作彼楹宇之彫毀當修葺之修本乃詢事  
 考言庀徒涓日而梅梁初構丹雘暨茨藻賁壇亭周列槐  
 杏雙童夾侍宛然叔仲之容十哲旁羅莞爾言游之對中

散大夫守司馬黃履順通議大夫行長史盧季珣闕一大

夫行司馬趙慶逸並鸞鶴羽儀珪璧符彩比影迭耀闕二

別乘朝議郎行錄事參軍李瑱司功參軍楊淑司倉參軍

楊寧司兵參軍李和仲司闕一參軍扈德思司士參軍甄

茂成參軍事李直蕭誼楊絳崔某等並因陪祭上丁肅稽

洪烈乃颺言曰周則甘棠蔽芾召伯之所存也魏則茂柏

森沈劉君之所藝也今則崇廟設象姜公之所訓也而三

賢異日萬古同風使躅空存芳名永缺式瞻真範猥及庸

愚游夏難言惕焉兢懼徒以服勤訓迹二紀於茲願備所



金定全唐文 卷三十一  
六  
聞敢爲頌曰

昔在黑帝感搖光兮白蜺貫月誕幽房兮惟我皇祖元禽  
翔兮授命天人降生商兮猗歎父嘉五族昌兮君子萬年  
必有光兮固天將聖不代彰兮爲漢制法闡文章兮帝道  
喪矣霸道項強兮乾坤不交小人長兮其誰宗予遂遑遑  
兮鳳鳥不至麟亦傷兮述明六藝爲紀綱兮身歿道存名  
益亨彰兮永垂代式謂素王兮泗濱旣葬水泱泱兮何壹  
男子上吾牀兮我壁有七張伯藏兮萬代禮樂惟薦香兮  
昔邵分陝坐甘棠兮惟劉典郡建廟堂兮歲不我與日毀

荒兮載修載葺我公姜兮威儀象設則平鄉兮髣髴藻繪  
旣煒煌兮乃刊貞石頌芬芳兮今來古往永無疆兮

鄭子春

子春開元時官陳州長史

北嶽廟碑

夫清明著象廣大成形聖人則之作紀資始列於五嶽視  
以三公率由典常靡不崇燎維厥恆岫實爲首稱故知碣  
石太行萬里延袤闕聳河澣盤薄海隅畢昴降其精涑易  
疏其浸設險以分中外通氣以出雲雷非陰陽不測之神



其孰能與於此也爾其峯嶸星聯草樹烟鬱雲仙表其窟  
宅珍怪產其高深感通應見必契誠德藏珎者知將亾之  
兆制勝者效率然之奇龍蛇羽毛安可詳悉幽贊設教神  
道有憑登臨極目如指諸掌其陰則常嶧廣武林胡樓煩  
其陽則燕趙殷衛面河沂雒自冀州旣載惟彼陶唐隄封  
庶品波委霧合財力豪贍貨殖繁滋遺風祠宇巋然無易  
敬神綏福不孤德鄰歆類誕靈可勝紀哉定人禦侮陳迹  
昭然易知簡能可大可久且收藏曰義生長曰仁仁義所  
攝祈禱如市有年登稔穰穰滿家和平是恃不生災害我

唐列聖重光再造區宇邦本胥悅俊人用彰天工所代無  
非淑哲惟良共此技賢責成彼美循吏其猶踵武自升中  
檢玉再展岱宗方嶽省巡躬行未給今之故事牧守是遵  
敬遠之規載在王府使持節刺史段公字崇簡學古入官  
政貴清淨人荷其惠吏懾其威博考前聞肅祇明祀每躬  
行奠享愷弟不怠神之所勞必在君子夫象設靈宇睟容  
凝湛未施敬而自敬不有威而自威而簷廡階闈尚多湫  
隘未增間敞折衷有虧長松靡柏逕隧猶褊公乃審面勢  
規曲直延觀宇劃垣墉高閑闕通巷術周覽彌望列樹豐



欽定全唐文 卷三十九  
碑容衛森羅藻繪彪駁納日月於局牖駐雲霧於軒楹光  
色焜煌爛如貝錦不費財力而忽贍不徵力役而自成求  
諸志誠不亦冥助先是冀方遐邇溥獲元吉初求厚報其  
徒實繁如山如流委輸所積物無遺乏人不勦勞易於從  
事百姓無擾商農工賈孚信不遺休徵允集是依是賴自  
東胡逆命多歷歲年推亾固存天心獨昭乃命大使輔國  
大將軍左羽林衛大將軍幽府長史兼御史大夫經略軍  
支度營田節度副大使兼知河北道採訪使南陽郡開國  
公張守珪分閫董戎假節專制抗稜運策凶渠喪元屈人

不戰種落夷謐初有南陽人田登封於此祈福神君降形  
而謂之曰吾方助順取彼殘孽殄殲元惡懸諸藁街果如  
其期止暴寧亂兵不血刃野不曝骸迺聖迺神幽贊斯在  
雖霍山之祐無恤新城之見申生以此寄言曾何等級由  
是厖耆耆老皤皤然被黃髮者相率而言曰某等上從祖  
德下及孫謀百有餘年沐浴皇化鼓腹擊壤賡歌太平今  
屬牧守仁明正身率下我有枳棘岑公不伐而自除昔無  
襦袴廉叔聿來而稱足別駕符子規長史高元奉司馬李  
賈等咸輔導忠益克表緹紬詢謀公道實毘方嶽況乎廣



運不測幽明協和謀無遺筭人不勞止刊石紀事不亦宜  
乎子春才愧色絲學非博物課虛杼軸敢讓當仁詞曰  
巍巍巨鎮幽都是託上接蒼昊傍分寥廓並吞冀野枕倚  
沙漠華夷險界隔閔斯作其一凡所敬遠心惟鬼神式昭祀  
典大庇烝人苛慝無作政教日新不孤其德必有其鄰其二  
水火金木配神作主允茲嶽靈實司朔土東生南長西成  
北聚層庫開藏爰及坻庾其三五載四觀今古有殊豐約異  
軌禮物分區明德無替潔菜不渝神理昭晰感應冥符其四  
昇中告禪名山有五禮亦從宜何必循古率先岱宗望秩

周普精一無差允膺福祐其五隨時珍薦必俟王言或降卿  
士或命司存執禮必備恭惟駿奔式禋明德荷會乾坤其六  
我皇立極阜俗寧亂賢才是以凶族咸竄蕞爾林胡假息  
離叛殲魁撫脅人神協贊其七疇咨牧守實獲我公既敷惠  
渥亦扇仁風有葺斯廟陋彼昔功隘狹增廣宏廓傍通其八  
庭廡遂敞官衛彌飾繪事後素昭彰歛赭工無遺巧人不  
勞力垣墉徑遂內方外直其九門閤高聳豐碑列樹相質匪  
工受辛寧喻小子何讓敢忘景慕紀功書實恢我王度其十  
對投牋獲弟判



河內縣荀君林乘冰省舅冰陷而逝兄倫求屍不獲遂作牋與河伯經宿冰開獲君林執牋出鄉人告稱妖惑

覃懷舊壤野王遺跡元凱造舟於後忿生食邑於前自晉啟山陽鄭錫河沃精靈有作人物代興相彼君林實爲茂族感如存之念恭自出之心憑河履冰自貽陷溺終墜而死當奈若何類無忌之永休比元陽之相負況鴿原稱咏本在急難凡今之人莫如兄弟嫂溺禮通於援手季歿義切於投牋孝弟之心聰明正直靈鑒在斯信宿之間克備

喪禮誠有應於今日事無隔於古人告以爲妖未符通識誣人之罪法有恆規請據愆尤以定刑典

李龜年

龜年與其弟彭年鶴年同著名於開元時

對同爨不緦義居芝草判

得王甲與從母夫趙乙同爨乙有罪物故甲不爲三月服喪從母訴甲無義縣令王庚笞甲四十死州斷庚加役流庚不服又虞乙家五從義居園中禾生兩穗庭中產芝草葢形紫色鄰人



告隱瑞州不斷罪亦不上聞

命以義夫光昭令德俾立家室其

其一作禮

或有差同爨則總

已發檀弓之問義居成瑞雅均唐叔之謠王甲冥豫在躬物故無服虞乙至誠必察感而遂通從母薄言因遘憫而興謗鄰人所告何至攻乎異端德音莫違及爾偕老制義居業光輝日新總帳空懸悲淡苦月芝庭獨秀榮曜生春宿草之墳未展生芻之禮擢蘭之砌已交蓂葉之陰縣令能業其官懲忿窒慾州司以明庶政敢復未聞罰既甚於蹊田瑞頗陳於州里欲拘司敗法也何逃或禮出異文緣

情僂俛瑞符等級易有隨時未尋物故之由難語不應之坐竝詳靈草之異方書掩瑞之愆

李彭年

彭年開元中歷官兵部侍郎天寶中以罪流嶺南起爲濟陰太守累遷吏部侍郎元宗幸蜀賊陷西京脅授僞官憂憤卒贈禮部尚書

論刑法不便表

臣聞明王之理人也設法立制不私喜怒與天下共之忠臣之事主也竭誠盡節不顧榮辱欲天下利之故得上下



同心法令明一寬而有制從容以和此蓋刑措太平之道也今陛下作人父母勤憂庶政從諫不拂居安慮危臣所以敢進逆耳之言忤旨之罪伏願陛下少垂照察幸甚臣聞書曰罪疑惟輕功疑惟重與其殺不辜寧失不經好生之德洽於人心竊見紫微主書趙誨爲取蕃人末河利刀子趁文書特敕處盡趙誨受贓罪不枉法又異監臨貪以敗官事雖挂網議而定罪國有常條若必責之以極典假有罪重倣此者陛下復何以加之於法乎臣又聞政之所興事資賞罰賞罰必信人心乃安輕重或虧手足無措

陛下若以借趙誨之命勵貪吏之心以臣之愚又將未益夫法存畫一不啟二門者蓋示人以信也先教後罰寧僭無濫者不陷人以罪也若有犯必死則非薄刑之意同罪異罰又非畫一之道何必殺之示信臣非愛人命也惜陛下之法也昔者渭橋驚馬空見罰金高廟盜環惟聞棄市漢幾刑措職此之由釋之之言可以爲喻伏惟陛下少留意焉抑臣聞之死者不可復生雖欲改過自新其道無由及也殺氣方深嚴刑在近一物失所聖心不安臣忝諍臣不敢不奏又典律所制輕重各殊笞杖是輕徒死是重爰



自近日此道便乖凡所決囚例多非命此乃徒刑有必生之理杖刑爲致死之條旣紊國經有傷和氣又凡曰造僞例是死囚伏準條格先決一百旣要之以斬罪何更加以杖刑臣雖至愚猶知不可凡百達識孰謂其宜又周禮論刑刺之典一曰訊羣臣二曰訊羣吏三曰訊萬人陛下若以臣所言事非可用則願陛下訊以羣吏詢諸宰臣擇善而行國之利也夫古之人臣于救危犯者非一人也然遇主榮達者萬無一也其遭咎罹禍者不可勝數以此觀之豈臣之利也誠爲主也伏惟陛下深察之臣識謝中庸才

非上達猥以承乏叨居諫官旣無涓埃之効實多尸素之責謹獻愚直輕觸威嚴儻益萬分甘之九死

### 第二表

臣某言臣伏見詔書內外官取受一匹以上科本罪外放歸田里五匹以上仍於犯處便附貫者臣聞國之大禮必存其故不易其宜循其教不易其俗故禮曰刑者例也一成而不可變此則百代常行之道也周禮曰刑新國用輕典刑平國用中典刑亂國用重典此又三等用刑之意也然設三槐九棘之吏入鈞金束矢之條蓋又慎之至也故



詳刑則死者不恨而生者不怨怨恨不生則災害不作災  
害不作則太平之理也以堯舜之聖猶曰惟刑恤哉以成  
康之賢故稱明德慎罰爲政之道可不慎歟自周室寢微  
穆王荒耄作五刑之屬立三千之條度時而用所謂刑亂  
者也春秋之時王道寢壞征伐交起教化不行子產鑄書  
見疵於叔向荀寅設法獲毀於仲尼偷薄之政自是滋矣  
秦至始皇專任刑罰赭衣塞路姦邪並生囹圄成市天下  
愁苦劉項一呼土崩瓦解降自魏晉至於陳隋歷代興亡  
莫不因此故孔子曰禮樂不興則刑罰不中刑罰不中則

人無所措手足誠哉是言也當今天下有道庶政惟和四  
方無虞萬邦從政正可勝殘去殺道德齊禮大革前非淳  
風一變今乃下明敕峻刑書深非元元之望也夫刑罰者  
御人以威法令者示人以信若成而數變則人之心不安  
嚴而必行則獄訟滋起先王所言議事以制不爲刑辟者  
懼人之有爭心也伏惟陛下取鑒前典率由舊章國用常  
刑俯收嚴典則政經有序德洽人心萬姓咸曰大哉王心  
茲用不犯於有司矣且臣聞寬者仁也政者正也上正其  
道下必從之陛下居無爲之時行不嚴之化則如風偃草



日用而不知豈待威之以濶刑而欲革之以貪性苟縱免而無恥亦何益於政哉臣又聞之至刑無所用至政無所理故楊泉物理論曰姦與天地俱生自然之氣也人主以政御人政寬則姦易禁政急則姦難絕今法雖大設犯者逾多臣愚以爲持政之急老子曰法令滋章盜賊多有此蓋急刑非止姦之意伏願陛下濶思之臣識見近淺才非匡濟謬參列侍忝齒諍臣敢不竭誠以速官謗儻裨政化雖死猶生

申屠液

液開元十二年官亳州臨渙縣尉

號國公楊花臺銘

原夫真性卽空從色聲而有相道源無體因法教以沿流所以人天捨千萬之資神鬼建由旬之塔金衣紺髮盡留多寶之臺銀疊青蓮並入真珠之藏湛然釋氏一千餘年輔國大將軍號國公楊等皆天子貴臣忠義盡節布衣脫粟將軍有丞相之風牛車鹿裘驃騎減中人之產爰抽淨俸申莊嚴之事也華簷覆像盡垂交露之珠玉砌連龕更飾雄黃之寶風箏逸韻飛妙響於天宮花雨依微灑香塵



於世畢猶恐蓬萊海變石折不周仍鐫長者之經必勒輪王之偈書工紀事迺爲銘曰

昭昭大覺巍巍聖功身融刹海願洽虛空閑眾趣以窒惕闡元門以包蒙物成緣而必應理無幽而不通有美至人股肱良臣受聖委任聞難經綸英謀貫古韜略通神一蒙金鉞屢建華勛善代不伐功成不居功歸天子善託眞如乃貢靈相用答冥符佛心雖空佛福常在願普此因同臻性海

戴璇

璇天寶元年官朝散大夫守倉部郎中

大唐聖祖元元皇帝靈應碑

至矣哉皇法於天天法於道居大寶者必尊祖以配天孩庶類者咸宅生以母道故四維張國遠宗元教三后在天代紹明德然後彌綸區宇昭格神祇其能繼休美之聖烈首千古之洪化者卓哉煌煌歸我唐室矣皇上受圖享國蓋三十戴功侔天地孝誠祖考其高明也布星辰以有倫其博厚也振河海而不洩至於揖羣后敘彝倫陶鑄堯舜湫隘軒頊者乃皇上之餘事也嘗端居宣室緬懷至道惟



德動天夢啟靈應忽恍有物希夷元通實元祖之明命錫  
無疆之寶歷乃潛誌元象遵誥旁求西亘太白東連鄆杜  
號周史之經臺枕秦山之幽谷肇居尹喜集法侶爲道門  
後遇皇唐易樓觀爲宗聖藥井尚滌僊軾仍存卜勝宗元  
此爲俶落飛泉噴石重林闕景苔蘚地偏以恆淡烟雲晝  
晴而不散睟容挺出赫然有光煥白虹於玉座紉紫氣於  
仙境洎邁睿覽宛符夢寐禧蓋聖人有以見天下之賾而  
擬諸形容聖人有以見天下之動而觀其會通者可舉之  
一隅矣其始迓也焚芝朮辟葷羶寂歷無聲擎蹠有則初

靡荔席次登靈壇徐肩綵杠少息華館清籟颺於草樹  
天雪氛氳於崖谷及路轉莽蒼風順崆峒雲鶴翊以導輿  
羣僊扈而成剡逮地邇天苑闈轉國門蛻旌鳳簫風馳海  
合絳節羽蓋波屬霧委萬姓翹首於西城百辟候儀於北  
闕禺禺如也皇上乃捧昇露寢奉先思孝集僊府以陳齋  
圖混成而告遠不崇朝而通八景未浹旬以遍六合故羣  
臣率舞慶靈稱觴獻壽森旗伐鼓何其盛哉於戲元元之  
道旁礪萬物妙爲化先豨韋氏得之而挈天地伏羲氏得  
之以襲氣母至若王母西崑比之如朝菌麻姑東海涵之



欽定全唐文 卷三百二十一  
如夏蟲沖虛馭風蓋錙銖於糠粃王喬控鶴方輜輳於蓬蒿信無上歟信元氣歟且天啟皇唐儲祉罔極其功神者其應大其源靈者其流長昔王室將傾我則電擊以存國介邱望幸我則雲行以告成汾睢祀我則順子以尊后陵寢肅雖我則述經以明孝可謂重倚坤軸復紐乾綱漫衍葳蕤皆皇極之大造也其修缺禮補樂章存樸以嗇人陳兵以訓武奔四夷以歸化主百神而授職者可勝言哉古有仁片言而受福樹一善以獲應況網羅眾制包括鴻徽以神化之貞明協靈命之幽贊克奮修祉不亦宜乎玉

真長公主以天孫毓德帝妹聯貴師心此地杳捐代情奏黃籙以比絜瞻白雲而志遠觀主李元崩監齋顏無待上座傳承說爲學日益爲道日損逍遙山林之下彷徨塵垢之外因聚而議曰今自道以祐主自主以祐人下覃六經上契三極風后力牧協宣朝政關雎麟趾宏被國風禎祥荐臻祆沴不作足以規萬葉示將來赫赫巍巍以表靈貺而迺謝奚斯頌魯之義闕穆滿銘弁之遊是上蔽天休下虧臣禮緣事斷諠蒙竊惡焉於是塾屋宰李嗣琳同荷湛恩以備能事博詢墨客以贊皇道時戶部郎中沛國劉同



昇才清起草譽美郎官之列文慕上林能揚天子之事共  
遵大雅以揆其辭奉為頌

劉同昇

同昇開元中官侍御史天寶元年授朝散大夫戶部郎中

大唐聖祖元元皇帝靈應碑頌

終南之山多喜境關令尹真宅茲嶺陰陰松柏造華頂草  
結花樓龍護井靈僊之窟肅而靜其一惟皇夜夢真人來神  
光赫赫金銀臺瑤容綽約冰雪開霓裳羽駕紛徘徊前聖  
後聖相承哉其二帝心虔求齊王京王公百辟咸致誠雲旗

綵仗森出迎日月晏溫顯氣晶真容來兮受天慶其三真容

來兮聖人壽千春無涯百福有真容來兮寶歷昌遠郊却

馬雄四方紫殿敷座煙雲香拜手稽首天地長元元之祉

萬斯唐其四

對大夫祭判

有五品祭寢不祭廟饌用索牛御史劾於寢則

已陋於饌則已泰訴云禮令無違

國政通班書崇明祀朝則齒爵載分於羔雁祭必毛牲取  
類於豺獮惟彼五品薦於四時籩豆聿修履濡霜而或惕



金定全唐文 卷三十一  
寢門是祭因掃地而致誠克恭行葦之酌或備采蘋之奠  
雖夫子立言且云寧儉而聖人行禮必貴從宜恭已習常  
情稱偪下因心達孝事則由衷屬避馬申威出漢臺而有  
問索牛是劾撫周禮而猶疑饌取於豐祭從於薄過如不  
及吾恐失之必存著甲之令請恕先庚之罰

對不供夷盤判

三品喪事夷盤不供司儀云時所不要

喪事攸列凶禮克明佐器者存乎有司致用者期於無悞  
綴几初設已陳含玉之儀夷盤不供何施造冰之禮且議

事以制觀過知仁必若夏日斯炎臭亾達於墻屋亦或當  
秋露結刑宜麗於簡書如或冬淒已冰寒氣方總則史魚  
之殞雖且在堂咎繇之謨終期緩獄理則可也彼其詰哉



欽定全唐文卷三百三十目錄

韓賞

告華嶽文

盧渙

大唐河南府陽翟縣善才寺文蕩律師塔碑銘  
序

史承節

鄭康成祠碑

封常清



遺表

獨孤峻

對舉似已者判

沈東美

對薦賢能判

大斟酌酒判

孟匡朝

金樽含霜賦

李暉

祭北嶽報雨狀

韋恆

對習星歷判

李愷

重與蕭十書

陸據

對蜡饗不祀判

崔顥

薦樊衡書



薦齊秀才書

趙煜

東都留臺石柱記

欽定全唐文卷三百三十

韓賞

賞開元中官御史歷右補闕戶祠二部員外郎

告華嶽文

惟廿七祀孟秋右補闕韓賞敢昭告於泰華府君祠廟惟  
天地生於人惟山川主乎神人有識而神有靈人貴聰而  
神貴明於昭靈山與天窈冥載在祀典鎮於上京自古帝  
王徵應不一荒淫者神降之凶聖哲者神授之吉惟茲臣  
庶鑒乎得失今予小子造於神祠將有所盟神其聽之人



有嗜好各為私禱顧無所求唯道是憂今者內禱於身外  
盟於神如有一心公朝戮力生人惟神是福崎嶇世道僂  
俛在位惟神所殛必將忘身奉國為本圖憂國濟人為已  
任明明泰華昭鑒於茲瞻彼牲牢抑惟常禮神嗜正直意  
存精誠正直以享神精誠以享意拳然跼慮瞿然改容益  
靈山之嵯峩增壽宮之肅穆歷階趨庭髣髴其形尚饗

盧渙

渙開元十三年官告成尉

大唐河南府陽翟縣善才寺文蕩律師塔碑銘

并

序

昔者混元既闢生法世始舟車莫用言教不施愛憎之心

未生爭奪之源未起則昔

闕一

劫如來無為而化者矣其

後人懷惡念資變淳風刀俎遍於三界生死繁於六道我

慈氏大憐庶品宏茲祕藏甘露正法爰啟

闕一

石之資身

穴手足竭其負擔之用披地輿而考勝列龜謀而定域或

陟在巘或降在原倘佯焉彷徨焉而得於夏城之隅

闕二

觀其後背增巖前臨平野居然曠望四時有霜雨遞來直

置孤標千里與雲虹競秀信安神之妙境有塔之宏

闕一



者焉越闕一字 開元十一年十月十七日巳酉奉迎律師全

身寧於茲塔寺主昔承灌頂今為闕則天偉之乃移法服

授以榮班拜游擊將軍非其好也寺主道風素遠天爵自

高朱紱方來雅操難奪固讓朝命願復緇衣則天多之闕

字闕一特闕一字 教授善才寺主并賜內府絹一百匹雜綵三十

段仍許至寺大闕一字 法會以光其業寺主常以為徒宏願

衣服卧具甘闕一字 明昏拯溺雖報如來之恩蕪沒塋園未

盡師資之禮於是撞鐘定策紉面闕門恆沙眾生咸從頂

受其有位階十地身現四生守遮制之科宮牆莫測闕運

慈悲並行廣大難思者其惟我律師乎俗姓藥氏河南密

人也闕一字 正見家含天仁性清心自樂宴坐窮年納芥而

羣有頓無觀身而眾妙皆盡若是乎律師常持金剛經心

禪口誦不捨須臾闕二字 則天樂自鳴中夜則異香頻降故

為道俗之所欣然人天之所歸仰也春秋七十有五以大

唐開元七年五月九日夜闕二字 悟色相之皆空示生滅而

警眾嗚呼風雲昏闇眾鳥悲鳴朝野悽慘神龍震驚以其

年五月十一日權殯於夏城闕一字 有大弟闕一字 寺主八智

俗姓張氏清河郡人德業宏浚風神秀遠所作已辦在邦



必聞證聖中則天聞而嘉焉召見於同明殿因陳濟國安人之道闕一神足復於塔右置立香園率諸門徒闕三掃

手植松柏千有餘株寺主早悟色空念茲生滅觀石火之

非久歎芭蕉之不堅預於下層自託終制誠門弟子曰吾

自幼出家奉事和上和上者則我慈父生我法身吾欲萬

劫歸依兩肩負荷既沒之後無背吾言故其塔下層即寺

主之所宅也至矣哉寺主之為道仁不念本季極尊師自

非六行總持十力無畏安能預於斯乎次有弟子延祐等

三十人闕一嵩頴名家法門闕一寶戒珠清靜心猿調伏

咸能叶贊封樹同規祠塔僉共謀可久之迹垂無窮之紀  
恐汗簡之難存勒高碑而播美銘粵

至哉聖覺淵乎調御開拓慧境昭融昏趣演偈孤園全功  
雙樹魔風不競法流長注其猗歟碩德像教護持禪薰廣

被戒靜難思經窮貝葉劫盡天衣高燈正朗墜露俄晞其  
爰有上人心源猛利擯落朝組周旋了義邱首垂仁駢胝

答施尊師踴塔如佛無異其岌岌孤秀迢迢削成金繩闕

字綴寶鐸風鳴香烟作雨伏檻流星房廊遶護花藥經行

其夏后城池至今猶在此闕三千里豈改有道貧賤浮生



危殆託遺跡於後賢儻斯文之可采

史承節

承節萬歲通天元年充河南道察訪使元宗初官邢州刺史

鄭康成祠碑

夫囊括宇宙者文字發明道業者墳典是以聖人作而萬物覩賢人述而百代通禮樂得之以昭明日月失之而寒忒宣尼彰刪緝之功始皇速燒焚之禍迨乎羣儒在漢傳註瑤莫不珠玉交輝纖微洞迹同見集於芸閣獨有

字關一

莫不珠玉交輝纖微洞迹同見集於芸閣獨有

綴於環林豈若經教奧義圖緯浚術兼行者多無如我鄭公也公諱元字康成北海高密人也八世祖崇哀帝時爲尚書僕射公少爲鄉嗇夫不樂爲吏遂造太學師事第五元始通京氏易公羊春秋三統歷九章算術又從東郡張欽祖受周官禮記左氏春秋韓詩古文尚書攝齋問道摠衣請益去山東而入關右因盧植而見馬融考論圖緯乃召見而升樓精通禮樂以將東而起嘆三載在門十年歸邑及黨事起遂杜門不出隱修經業於是鍼左氏之膏肓起穀梁之廢疾而又操入室之戈矛發何休之墨守陳元



李育校論古今劉瓌范升憲章文議何進延於几杖經宿而逃袁隗表爲侍中緣喪不起孔融之相北海屣履造門陶謙之牧徐州接以師禮比商山之四皓鄉曰鄭公類東海之于公門稱通德漢公車徵爲大司農給安車一乘所過長吏迎送公乃以病自乞還家董卓遷都長安公卿舉公爲趙相道斷不至會黃巾寇青部乃避地徐州建安元年自徐州還道遇黃巾賊數萬見公皆拜相約不敢入縣境時大將軍袁紹總兵冀州遣使邀公大會賓客乃延上坐身長八尺飲酒一斛秀眉明目儀容溫偉客多豪俊并

有才說見公儒者未以通人許之競設異端百家互起公依方辯答咸出問表皆得所未聞莫不嘆服時汝南應劭亦歸於紹因自贊曰故太山守應仲遠北面稱弟子何如公笑曰仲尼之門考以四科回賜之徒不稱官闕劭有慚色門人相與撰公答諸弟子問五經依論語作鄭志八篇公所注周易尚書毛詩儀禮周官禮記孝經尚書大傳中候乾象歷又著天文七政論魯禮禘祫義六藝論毛詩譜駁許慎五經異義答臨孝存周禮難凡百餘萬言經傳洽熟稱爲純儒其所撰注今並通習是知書有萬卷公覽八



金定全唐文 卷三十三 六  
千也齊魯間宗之公後嘗疾篤自慮以書戒其子益恩書  
曰吾家舊貧爲父母羣弟所容去廝役之吏遊學周秦之  
都往來幽并兗豫之域大儒得意有所受焉遂博稽六藝  
麤覽傳記時觀祕書緯術之奧年過四十乃歸鄉假田播  
殖以娛朝夕後舉賢良方正有道辟大將軍三司府公車  
再徵比牒併名皆爲宰相唯彼數公懿德大雅克堪王臣  
故宜式敘吾自忖度無任於此但念述先聖之元意思整  
百家之不齊亦庶幾以竭吾才故聞命罔從而黃巾爲害  
萍浮南北復歸鄉邦入此歲來已七十矣宿素衰落仍有

失誤按之禮典便合傳家今我告爾以老歸爾以事將閒  
居以安性覃思以終業自非拜國君之命問族親之憂展  
敬墳墓觀省野物胡嘗扶杖出門乎家事大小汝一承之  
咨爾煢煢一夫曾無同生相依勗求君子之道研鑽勿替  
敬慎威儀以近有德顯譽成於僚友德行立於己志若致  
聲稱亦有榮於所生可不淡念耶可不淡念耶吾雖無紱  
冕之緒亦有讓爵之高自樂以論贊之功庶不遺後人之  
羞凡某所憤憤者徒以吾親墳隴未成所好羣書率皆腐  
敝不得於禮堂寫定傳與後人日西方暮其可圖乎家今



欽定四庫全書 卷三百三十一 七  
差多於昔勤力務時無恤飢寒菲飲食薄衣服節夫二者  
尚可令吾寡恨若忽忘不識亦已焉哉五年春夢孔子告  
之曰起起今年歲在辰來年歲在巳既寤以讖合之知命  
當終有頃寢疾年七十有四以其年六月卒遺命薄葬自  
郡守以下嘗受業者衰經赴會千餘人乃葬於高密縣城  
西北一十五里礪阜山之原嗚呼哀哉有子益恩孔融在  
北海舉爲孝廉及融爲黃巾所圍遂赴難捐身有遺腹子  
公以其手文似已名曰小同精通六經鄉人尊之時爲侍  
中嘗詣司馬文王文王有密疏未之屏也如廁還問曰卿

見吾密疏乎答曰未見文王曰寧我負卿勿卿負我致鴆  
而卒悲夫自夫子沒後大道方喪公之網羅遺典揆蹟今  
猶特立鬱然時季途迤志不苟變全身遠害猗歟美歟及  
范史作論有曰王父豫章君每考先儒經訓常以爲仲尼  
之門不能過也及傳受生徒專以鄭氏家注云晉中興戴  
逵字安道以雞卵汁澣白瓦屑爲公作碑手自書寫文  
字語亦妙絕年代古而碑闕亡德音賈而詩書在承節以  
萬歲通天元年奉敕於河南道訪察觀風省俗激濁揚清  
行至州界見高密父老云鄭先生漢代鴻儒見無碑記不



以庸妄遂託爲文往以會府務殷

關一

無暇景歲序遷貿

執筆無由今者罷職含香忝居分竹屬以閒隙乃加修撰  
者舊者唯聞其名後生者不覩其事今故尋源討本握槩  
懷鉛無疏本傳之文並序前言之目發九泉之冥昧播千  
載之

關二

字翦以繁華不爲雕飾銘曰

煥乎人文圖稽典墳煩亂事翦定自孔君中途湮沒秦帝  
沮焚漢興儒教鄭氏超羣膏腴美地簪紱宏規嗇夫罷署  
京兆尋師中候乾象左氏韓詩雖稱積學殆若生知公之  
挺生大雅之懿囊括墳典精通奧祕六藝殊科五經通義

小無不盡大無不備好學慕道深思遠慮來往周秦經過  
充豫侍中不仕司農罷署盧植東遇孔融西去作者謂聖  
述者謂明躬違三辟門傳五更周官東部漢隄西京白玉  
遍地黃金滿籬占卜潛橋行途過沛陶謙師友孔融高蓋  
山啟黷扉草生書帶七十歸老三千赴會經傳洽熟齊魯  
攸宗爵祿不受贊論爲功禮樂今去吾道皆東類於標德  
比皓稱公闡尹擅貴禁錮連年乃逢宥罪方從舉賢南城  
避難東萊假田誕膺五百中覽八千今年在辰來年在巳  
嗚呼不慙吁嗟到此勞我以生息我以死道該八表神交



千祀濰水之曲礪阜之陽通德爲里鄭公爲鄉雲愁廟古  
月暗墳荒舊碑先歿新石再彰詞愧黃絹心淒白楊名譽  
不朽終古騰芳

封常清

常清蒲州猗氏人爲都知兵馬使高仙芝判官累以軍功  
授鎮將果毅折衝天寶十一載擢安西副大都護攝御史  
中丞持節充安西四鎮節度經略支度營田副大使知節  
度事十四載爲范陽節度使募兵討安祿山兵敗奔陝郡  
削官爵白衣從仙芝軍效力與監軍邊令誠不協奏其逗

撓誅之

遺表

中使駱奉仙至奉宣口敕恕臣萬死之罪收臣一朝之效  
令臣卻赴陝州隨高仙芝行營負斧縲囚忽焉解縛敗軍  
之將更許增修臣常清誠懽誠喜頓首頓首臣自城陷已  
來前後三度遣使奉表具述赤心竟不蒙引對臣之此來  
非求苟活實欲陳社稷之計破虎狼之謀冀拜首闕庭吐  
心陛下論逆胡之兵勢陳討捍之別謀酬萬死之恩以報  
一生之寵豈料長安日遠謁見無由函谷關遙陳情不暇



欽定全唐文 卷三十一  
臣讀春秋見狼曠稱未獲死所臣今獲矣昨日者與羯胡  
接戰自今月七日交兵至於十三日不已臣所將之兵皆  
是烏合之徒素未訓習率周南市人之眾當漁陽突騎之  
師尚猶殺敵塞路血流滿野臣欲挺身刃下死節軍前恐  
長逆胡之威以挫王師之勢是以馳御就日將命歸天一  
期陛下斬臣於都市之下以誠諸將二期陛下問臣以逆  
賊之勢將誠諸軍三期陛下知臣非惜死之徒許臣竭露  
臣今將死抗表陛下或以臣失律之後誑妄爲辭陛下或  
以臣欲盡所忠肝膽見察臣死之後望陛下不輕此賊無

忘臣言則冀社稷復安逆胡敗覆臣之所願畢矣仰天飲  
鴆向日封章卽爲屍諫之臣死作聖朝之鬼若使歿而有  
知必結草軍前迴風陣上引王師之旗鼓平寇賊之戈鋌  
生死酬恩不任感激臣常清無任永辭聖代悲戀之至

獨孤峻

峻開元末爲四鎮節度使夫蒙靈咎判官

對舉似已者判

丙充使舉似已者御史糾按丙稱但成三物唯

善能之



舉賢無私惟善所在苟利社稷無恤其他故德能佐時彭  
仲超於令尹才堪禦敵觀父統於三軍唯得其人似已何  
爽且魏獻舉代祁奚薦讎將利國是資不阻親怨以進賢  
爲務寧問回邪故能建彼一官成乎三物先賢所尚君子  
韙之事以類分云胡不可瞻言丙也直指是稱舉爾所知  
何敢沒沒良才眾矣多舉何妨御史繡服霜華驄威電發  
將違執秩言寘僕區曾不知獄也放紛刑乎頗類淫刑以  
逞誰則無辜得善誠則可嘉糾按斯爲戾也

沈東美

東美少詹事佺期子初爲府掾天寶中除膳部員外郎

對薦賢能判

甲薦賢能之士三詣公車試皆高第表請錫彤  
弓矢廷尉致詰詞云三適有功

舉善惟微知人則哲妙聞音者識窮山之竹能追芳者賞  
幽徑之蘭甲位登八命才高四岳言刈其楚有異錯薪載  
繫其駒屢聞驤首文舉之昇一鶚陶洪之披二龍曷足思  
齊寧將比價懿茲擢桂便請錫弓自伐誠則躁求議功何  
妨懋賞稽諸漢史軌躅昭然名器不可假人升降固宜合



欽定全唐文 卷三十三  
禮爵土互錫理或酬功弓矢斯張雅符謬請六卿司過三  
適胡爲

大斛酌酒判

元日會序賓光祿以大斛酌醴祈黃耆比部以  
無令式勾徵訢稱以引以翼古之道也

比年三年殷見時見大會正殿小會東堂典禮序以鬯珪  
建官司其鍾鎮瞻言光祿式遵古典且爾公酬匪無彝倫  
功沽之巧先資於麴蘖水泉旣香必潔於湛饔瑟彼玉瓚  
黃流在中挹彼注茲酌以大斛我客戾止嘉賓式宴呦呦

鹿鳴酒正斯舉振振路騫舞兕觥其觶俾爾戩穀永錫難老  
式夷式已以引以翼方得古人之禮寧虧聖主之私郎署  
雖欲淡文卿寺豈宐甘罪

孟匡朝

匡朝開元末官御史遷左司員外郎擢翰林學士

金樽含霜賦

夫何卜晝之不暇以清夜之方久垂玉漏之未窮賴金樽  
兮有酒霜入室兮夜何長樽含霜而醴澈霜覆醴而金光  
適足勁乎玉性亦何傷乎酒香夫如是樽旣可賞霜亦可



觀味資蘭桂影奪綃紈疊華彩於銀燭散餘光於玉盤況  
東堂清敞北斗闌干在公載宴廢寢相歡心飲冰兮猶熱  
酒飛霜兮豈寒斯蓋爲上台之式百辟少宰之設九流明  
命充選俾士全謀五權立而羣才入鏡三人行而一人同  
舟並錯薪於翹楚異攀桂之淹留每賞崇乎夜隙故樽列  
而霜浮於時星歲邁盡地有寒沍引颺風烏徘徊玉兔杯  
上霧起鑪前香覆對樽影而霜含況霜姿而粉傅非兕觥  
其觥粲乎自舉會心絜矩凝然抱素於是執簡爲名比玉  
同貞結而能白沖而不盈光露寢之舊席刻神鐘之遠聲

豈獨坐中藏器酒上含情者哉

李暲

暲太原景皇裔孫解褐枝江縣丞擢監察御史歷工兵吏  
三部尚書東都留守加太子少傅開元二十八年卒年五  
十八

祭北嶽報雨狀

臣至邢州雨降盈尺臣切問野老皆云往十二年春夏大  
旱六月下旬方始降雨其歲河朔大熟粟斗五錢今年得  
雨雖晚猶早於前歲百姓欣然咸有秋望臣受命之日祈



兩恆山玉幣未陳明靈已應實陛下至誠元感先天不違  
韋恆

恆贈兵部尚書嗣立子開元初為碭山令擢殿中侍御史  
歷度支左司員外太常少卿轉給事中二十九年為隴右  
道河西黜陟使時河西節度使蓋嘉運恃左右為非法恆  
劾奏之出為陳留太守卒

對習星歷判

得甲稱人有習星歷屬會吉凶有司劾以為祆  
款云天文志所載不伏

元象垂文星辰作範休咎之徵斯在吉凶之跡可明祕以  
人倫得之邦國既河長而山久亦自古而迄今尚有不遵  
典刑默習推步眷茲所學幸遇休明慕劉氏之高蹤仰張  
衡之舊業既而秋槎將泛知河漢之明梭太白初高識將  
軍之出戰雖災祥之屢犯在徵應之可憑若彛典以斯違  
亦公途而難舍有司情惟糾慝志切繩違告為祆訛事恐  
乖於五聽科其犯禁誠有叶於三章

李愷

愷并州文水人舉明經開元時累官河南少尹天寶中封



酒泉縣侯爲京兆尹改光祿卿東京留守安祿山反澄繕  
城壘訓勵士卒遏賊西鋒擢禮部尚書城破爲賊所害詔  
贈司徒諡曰忠懿河洛平再贈太尉

重與蕭十書

再覽來封皆如一面秋熱未解所履如何某拙疾但昧於  
理耳崔子日月漸遠弟故人情多一慟淡衷豈易論也委  
曲具悉待彼官到若有商量與申後意彼有人作主人否  
承郎欲還豈不能一至此也外郡感別情不易言道路無  
留滯朝廷待士論屈日深佇聞鳴躍勿至斷絕弟多才博

識言成楷模某棄廢之人何能爲也言談次可吹噓之令  
不負公私亦親故之情耳千萬千萬不具李澄諮

陸據

據字德鄰三十餘始遊京師舉進士累官司勛員外郎天  
寶十三載卒

對蜡饗不祀判

歲十二月有司將行蜡饗不祀司嗇迎貓而祭  
之御史糾云古之君子使而必報

窮陰殺節流歲云暮將舉祀典必參故實無忘報本之始



欽定全唐文 卷三十一  
敬用伊耆之禮聚百物以饗息人大義爲一日之蜡非賜所知瞻言所司是爲之祭八神降止一國期集於焉觀德必也知古迎貓無關言除碩鼠之患司嗇不預且有若敖之餒雖祭能如在樂已吹豳而禮尚有疵人多歎魯有鬼或爽誣神若何事乃違經儻受嗤於草服國有報憲宜見繩於繡衣

崔顥

顥開元中進士累官司勳員外郎天寶十三載卒

薦樊衡書

夫相州者先王之舊都西山雄崇足是秀異竊見縣人樊衡年三十神爽清悟才能絕倫雖白面書生有雄膽大略淡識可以軌時俗長策可以安塞裔藏用守道實有歲年今國家封山勒崇希代罕遇含育之類莫不踴躍況詔徵隱逸州貢茂異衡之際會千載一時君侯復躬自執圭陪鑿日觀此州名藩必有所舉當是舉者非衡而誰伏願不棄賢才賜以甄獎得奔大禮升聞天朝衡因此時策名樹績報國榮家今當代之士知出君侯之門矣顥不勝區區敢聞左右俯伏階墀用增戰汗



薦齊秀才書

某官至辱垂下問令公舉一人可管記之任者愚以為軍中之書記節度使之喉舌指事立言而上達思中天心發號出令以下行期悅人意諒非容易而可專據竊見前進士高陽齊孝若考叔年二十四舉必專授文皆雅正詞賦甚精章表殊健疏眉目美風姿外若坦蕩中甚畏慎執事倘引在幕下列於賓佐使其馳一檄飛一書必能應馬上之急求言腹中之所欲夫掇芳刈楚不棄幽遠况孝若相門子弟射策甲科家居君侯之宇下且數年矣不勞重幣

而獲至寶甚善甚善雄都大府多士如林最所知者斯人也請為閣下記其若此唯用與舍高明裁之謹再拜

趙煜

煜字雲卿鄧州穰人開元中舉進士連擢科第授大理評事乾元初累拜左補闕遷祕書少監建中四年卒追贈華州刺史

東都留臺石柱記

天垂象聖人則之故星有執法職有持憲皆鐵冠繡衣直指不阿俾在位者肅如也日者天子在鎬庶官分守於是



乎有留臺所以上至中司鶚峙都邑夫洛陽有明堂辟雍  
太倉武庫郊廟百祀邦畿百域有不如法得舉劾之至若  
密網峻威微文深詆眾所嚴憚愈於京師蓋由臨之者專  
也奉之者一也專則權有獨斷一則政無多門前達以之  
立名於此暨皇運中興與人休息雖風移代變煩簡則殊  
而舉直錯枉典型猶在殿中侍御史河東薛公朝之望也  
復修舊職凜然生風秦官漢儀斯不替矣乃篆石題記使  
人不遺聊紀於近庶昭厥德始自乾元歲掌留務者次而  
書之以垂於後大曆八年月日記



